

14 NOV 2001

Harga-Kawal

KAWALAN KETAT ELAK KENAIKAN HARGA SEMASA MUSIM PERAYAAN

PETALING JAYA, 14 Nov (Bernama) -- Pemantauan ke atas barang keperluan akan diperketatkan menjelang Hari Raya Puasa dan Tahun Baru Cina bagi menghalang kenaikan harga, kata Timbalan Menteri Perdagangan Dalam Negeri dan Hal Ehwal Pengguna Datuk S. Subramaniam.

Katanya secara keseluruhan, pemantauan yang dibuat oleh bahagian penguatkuasaan kementerian telah berjaya menghalang kenaikan harga semasa perayaan Deepavali.

"Berdasarkan pengalaman kita, tidak ada masalah besar tetapi ada kemungkinan (harga naik). Biasanya pada Tahun Baru Cina kita menghadapi masalah kenaikan harga ikan dan itu jadi masalah besar tapi kita ada banyak strategi," katanya kepada pemberita di Rumah Terbuka beliau di Dewan Sivik Petaling Jaya hari ini, sempena Deepavali.

Bagi mengatasi masalah kenaikan harga ikan, kerajaan mungkin membenarkan pengimportan jika bekalan dalam negara tidak mencukupi, begitu juga dengan barang keperluan utama seperti beras pulut yang banyak digunakan untuk Hari Raya Puasa, katanya.

"Kita juga nasihatkan mereka yang tidak meraikan Tahun Baru Cina supaya jangan beli ikan (untuk mengawal kenaikan harga)," katanya.

Subramaniam berkata kementerian itu juga akan meneliti bekalan kelapa di dalam negara menjelang Hari Raya Puasa ini bagi mengelak kemungkinan kenaikan harga seperti yang terjadi kira-kira dua tahun lepas.

"Jika itu bakal terjadi, kerajaan akan mengimport kelapa dari Indonesia tetapi semuanya bergantung kepada bekalan dalam negara," katanya.

Kira-kira 1,000 orang mengunjungi rumah terbuka Subramaniam hari ini.

Turut hadir ialah Perdana Menteri Datuk Seri Dr Mahathir Mohamad, Timbalan Perdana Menteri Datuk Seri Abdullah Ahmad Badawi, Menteri Pengangkutan Datuk Seri Dr Ling Liong Sik dan Menteri Perumahan dan Kerajaan Tempatan Datuk Seri Ong Ka Ting.

-- BERNAMA

SLR ZS LAT